

EXP. 759/2023

**M^a DA CONCEPCIÓN MARTÍNEZ TABOADA, SECRETARIA-INTERVENTORA
DO CONCELLO DE TOÉN (OURENSE)**

CERTIFICO:

Que a Xunta de Goberno local do Concello de Toén (Ourense), na sesión que tivo lugar o día 05/12/2023 adoptou, entre outros, o acordo que de seguido se transcribe na súa literalidade, a reserva do que resulte da aprobación da acta correspondente:

“

6.3. Convenio de colaboración entre o Concello de Toén e a Comunidade de Montes Veciñais en Man Común A Fenteira de Puga para o financiamento dos gastos de mantemento e funcionamento da antiga escola de Puga e do local social da Picada (Exp. 759/2023)

O alcalde dálles conta aos/ás concelleiros/as que integran a Xunta de Goberno Local do borrador de convenio de colaboración entre o Concello de Toén e a Comunidade de Montes Veciñais en Man Común A Fenteira de Puga, que ten por obxecto regular as bases de colaboración entre ámbalas dúas entidades para o financiamento dos gastos de mantemento e funcionamento da Antiga Escola de Puga e do Local Social da Picada.

Nas bases de execución (base 24^a, apartado 1) do orzamento do Concello de Toén para o exercicio 2023, consta unha axuda con carácter nominativo para a entidade CMVMC A Fenteira de Puga, con CIF V32215212, polo importe máximo de 1.200,00 €, con destino ao convenio mantemento e funcionamento de instalacións de uso veciñal.

Logo de ver o borrador do convenio, a memoria xustificativa e o informe xurídico da Secretaría-Intervención municipal e de acordo co disposto na Lei 38/2003, do 17 de novembro, xeral de subvencións; na Lei 9/2007, do 13 de xuño, de subvencións de Galicia; e na Ordenanza reguladora da concesión de subvencións aprobada polo Pleno da Corporación na sesión que tivo lugar o día 18/11/2004, publicada no BOP nº 19, do 25/01/2005; a Xunta de Goberno Local, co voto favorable de todos/as os/as concelleiros/as que a integran e en uso das atribucións delegadas pola Alcaldía mediante decreto de data 26/06/2023, ACORDA:

PRIMEIRO.- Aprobar o borrador do Convenio de colaboración entre o Concello de Toén e a Comunidade de Montes Veciñais en Man Común A Fenteira de Puga para o financiamento dos gastos de mantemento e funcionamento da Antiga Escola de Puga e do Local Social da Picada que se reproduce como anexo a este acordo.

SEGUNDO.- Aprobar o gasto recollido no dito convenio por importe de 1.200,00 €, en concepto de subvención á entidade CMVMC A Fenteira de Puga, con CIF V32215212, baixo a modalidade de concesión directa prevista no artigo 5.b.1 da Ordenanza reguladora de subvencións deste Concello. A cantidade concedida irá destinada exclusivamente a sufragar os gastos derivados do obxecto do convenio de colaboración. A subvención satisfarase con cargo á aplicación 337.48 do estado de gastos do orzamento municipal do exercicio 2022.



TERCEIRO.- Facultar ao alcalde para a sinatura do correspondente convenio coa persoa representante da CMVMC A Fenteira de Puga.

ANEXO

EXP. 759/2023 BORRADOR DE CONVENIO DE COLABORACIÓN ENTRE O CONCELLO DE TOÉN E A COMUNIDADE DE MONTES VECIÑAIS EN MAN COMÚN A FENTEIRA DE PUGA PARA O FINANCIAMENTO DOS GASTOS DE MANTEMENTO E FUNCIONAMENTO DA ANTIGA ESCOLA DE PUGA E DO LOCAL SOCIAL DA PICADA

O presente convenio formalízase coa consideración de documento administrativo público para os efectos do previsto no artigo 26 da Lei 39/2015, do 1 de outubro, de procedemento administrativo común das Administracións Públicas, sendo asinado polas partes mediante firma electrónica ao amparo do previsto no artigo 10 do mesmo texto legal.

INTERVEÑEN

Dunha parte, Ricardo González Gómez, con DNI ***5919**, alcalde do Concello de Toén, actuando en nome e representación do Concello, en virtude do seu cargo.

Doutra, Serafín Rodríguez Domínguez, con DNI ***9350**, na súa condición de presidente da Comunidade de Montes Veciñais en Man Común A Fenteira de Puga (en diante, a Comunidade), con CIF V32215112.

A secretaria-interventora do Concello de Toén, M^a da Concepción Martínez Taboada, quen fai constar, dado que non existe unidade de acto ao realizarse a sinatura do documento por medios electrónicos, que a función de fe pública prevista no artigo 3.2.i) do Real decreto 128/2018, do 16 de marzo, polo que se regula o réxime xurídico dos/as funcionarios/as da Administración Local con habilitación de carácter nacional, en relación co disposto no apartado d) da disposición adicional oitava da Lei 7/1985, do 2 de abril, reguladora das bases do réxime local, limítase a comprobar a identidade das persoas intervinientes a través da documentación que forma parte do expediente, así como a verificar a validez das sinaturas electrónicas incorporadas ao presente documento, que os certificados das persoas asinantes non foron revogados e que non houbo modificacións no documento, actuacións que se realizan a través do xestor de expedientes Xestiona ou a través da aplicación Valide.

MANIFESTAN:

PRIMEIRO.- Que ámbalas dúas partes recoñécense mutuamente plena capacidade para a formalización deste convenio.

SEGUNDO.- O artigo 72 da Lei 7/1985, do 2 de abril, reguladora das bases do réxime local establece que as Corporacións Locais favorecen o desenvolvemento das asociacións para a defensa dos intereses xerais ou sectoriais dos/as veciños/as, facilitarlles a máis ampla información sobre as súas actividades e, dentro das súas posibilidades, o uso dos medios públicos e o acceso ás axudas económicas para a realización das súas actividades. O artigo 232 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais, di que na medida en que o permitan os recursos orzamentarios, o Concello poderá subvencionar economicamente ás asociacións para a defensa dos intereses xerais ou sectoriais dos/as veciños/as, tanto polo que se refire a gastos xerais como ás actividades que realicen.

O artigo 25 da Lei 7/1985, do 2 de abril, reguladora das bases do réxime local, atribúelle aos Concellos a competencia sobre a materia de actividades ou instalacións culturais e deportivas e ocupación do tempo libre.

TERCEIRO.- O inmovible da Antiga Escola de Puga (con referencia catastral DF0607000NG88E0001HE e inscrito no inventario de bens municipais -elemento urbano nº 119- aprobado polo Pleno da Corporación na sesión de data 24/03/2011) é de titularidade municipal. As instalacións veñen sendo usadas polas diferentes entidades asociativas da parroquia de Puga, entre elas pola Comunidade, para o desenvolvemento das súas actividades.

CUARTO.- O custo da enerxía eléctrica, tanto da propia escola como das instalacións anexas propiedade da Comunidade, veñen sendo asumidas pola dita entidade. O Concello ten a vontade de compensar economicamente á Comunidade polo dito gasto ao ser imputable parcialmente a unha instalación de titularidade municipal.



QUINTO.- A Comunidade realizou obras de rehabilitación e acondicionamento dun inmovible da súa propiedade en Puga con destino a local social, dando lugar ao que hoxe se coñece como 'Local Social da Picada'.

As ditas obras foron financiadas con recursos propios da Comunidade e cunha subvención concedida pola Axencia Galega de Desenvolvemento Rural da Xunta de Galicia. O Concello colaborou a través da concesión dun préstamo asinado con data 13/09/2013 - modificado con data 30/12/2013- por razón do interese público que supón a dotación ao núcleo de Puga dun local social para o uso dos/as veciños/as. Ademais o Concello veu concedendo anualmente unha subvención para cubrir os xuros que devengou o préstamo concedido (que foi cancelado definitivamente con data 04/10/2017).

O Concello non dispón na parroquia de Puga dun local debidamente acondicionado para a realización de actividades propias municipais, como actos culturais, reunións cos/as veciños/as, e outros de semellante natureza.

Por todo o anterior e co obxecto de acadar o fin proposto, o Concello de Toén e a Comunidade de Montes Veciñais en Man Común A Fenteira de Puga acordan subscribir este convenio de colaboración segundo as seguintes

CLÁUSULAS

PRIMEIRA.- O obxecto deste convenio é regular as bases de colaboración entre o Concello de Toén e a Comunidade de Montes Veciñais en Man Común A Fenteira de Puga para o financiamento dos gastos de mantemento e funcionamento das instalacións da Antiga Escola de Puga -en concreto dos gastos de subministración eléctrica- e do Local Social da Picada.

SEGUNDA.- O Concello comprométese a aboar a cantidade de 1.200,00 €, con destino ao financiamento dos gastos de subministración de enerxía eléctrica ás instalacións da Antiga Escola de Puga correspondentes ao exercicio 2023 (tamén se poderán incluír facturas do ano 2022 sempre que non foran presentadas para a xustificación da subvención concedida ao abeiro do convenio asinado con data 22/02/2022) e dos gastos de mantemento e funcionamento ordinarios do Local Social da Picada (enerxía eléctrica; calefacción; teléfono; seguros, limpeza, pequenas reparacións e outros de semellante natureza). De conformidade co acordado pola Xunta de Goberno Local do Concello de Toén na sesión de data, a cantidade indicada librarase con cargo á aplicación 337.48 do estado de gastos do orzamento municipal do exercicio 2023, tendo a consideración de subvención baixo a modalidade de concesión directa prevista no artigo 5.b.1 da Ordenanza reguladora de subvencións deste Concello.

TERCEIRA.- A Comunidade comprométese a cederlle o uso ao Concello de Toén das instalacións do Local Social da Picada, previa a comunicación do Concello, para a realización de actividades de competencia municipal tales como actos culturais; reunións; conferencias; actividades derivadas de procesos electorais, e outras de semellante natureza.

CUARTA.- De acordo co establecido no artigo 75 do Real decreto 887/2006, do 21 de xullo, polo que se aproba o Regulamento da Lei 3/2003, do 17 de novembro, xeral de subvencións; e no artigo 10 da Ordenanza reguladora da concesión de subvención do Concello de Toén, a entidade beneficiaria deberá presentar nas oficinas municipais antes do día 22/12/2023 a conta xustificativa que conterá a seguinte documentación:

- Memoria relativa aos gastos financiados con cargo á subvención concedida, co detalle do seu importe, provedor/a e concepto. Xuntarase unha copia das facturas coa xustificación do seu pagamento.
- Declaración subscrita polo/a beneficiario/a ou a súa persoa representante relativa á inexistencia doutras subvencións ou axudas que obtiveran para a mesma finalidade ou, no seu caso, mención expresa dos outros ingresos ou axudas que financiasen a actividade, con indicación do seu importe e procedencia.
- Declaración acreditativa de atoparse ó corrente das súas obrigas tributarias (Axencia Tributaria e Consellería de Facenda) e de Seguridade Social.

Poderanse facer pagamentos parciais a conta da xustificación final polo importe do gasto que se xustifique debidamente con presentación de facturas e xustificación do seu pagamento.

QUINTA.- A subvención prevista neste convenio é compatible con calquera outra que poida percibir a Comunidade polo mesmo concepto, sen prexuízo de que o importe total das subvencións percibidas non poida exceder do custo da actividade subvencionada.



SEXTA.- En todo o non previsto neste convenio, resultará de aplicación o disposto na normativa vixente en materia de subvencións.

SÉTIMA.- A duración do convenio fíxase dende a súa sinatura ata o 31 de decembro de 2023.

OITAVA.- A modificación do contido do convenio requirirá acordo unánime das partes asinantes.

NOVENA.- Son causas de resolución:

a) O transcurso do prazo de vixencia do convenio.

b) O acordo unánime dos asinantes.

c) O incumprimento dos deberes e compromisos asumidos por parte de algún dos asinantes.

d) Por calquera das causas previstas legalmente.

DÉCIMA.- Constituirase unha comisión paritaria formada por unha persoa representante de cada entidade asinante, coa finalidade de efectuar o seguimento do grao de cumprimento do convenio e resolver os problemas de interpretación e cumprimento que poidan xurdir.

DÉCIMO PRIMEIRA.- Este convenio ten natureza administrativa, quedando as partes suxeitas á xurisdición contencioso-administrativa, para a resolución de calquera conflito que puidese xurdir na súa aplicación.

E en proba de conformidade, asíñase o presente convenio electronicamente e a un só efecto, do que eu como secretario dou fe.

O alcalde

O presidente

A secretaria-interventora

.....”

E para que conste e produza os efectos oportunos, expido a presente certificación por orde e co visto e prace do alcalde en Toén na data da sinatura electrónica.

(Documento asinado electronicamente na marxe)

